

SUNS gnirà tla Ladinia

Invit a nosc ciantautours y grups de mujiga a tó pert a la selezion. Termen per mané ite na ciantia originala: 1^a de setember 2013

De plu a plata 3



Dant doi agn à l grup "Coffeshock Company" venciù con sia ciantia "Gusla mi se je znicila" l songcontest SUNS 2011 a Falera ti Grijons (pest dla Giuria). La "Coffeshock Company" vegn dal Burgenland (Austria) y cianta per croat. (foto:facebook/coffeshockcompnay)

Mujiga/1 - Bele de plu grups y ciantautours de vals ladines à ti agn passés tout pert al projet y concors internazional de mujiga SUNS, resservé a cianties originales scrites te n lingaz raté dai Statesc relatifs "de mendranza". SUNS é l maiour festival raional de chest vers, y al fej pert dl cercl internazional dl "Liet" (l eurocontest de cianties de mendranza); tres SUNS él ence gnu cualifiché i ultims agn i doi grups dl'Europa Zentràla per l eurocontest LIET. I lingac lascés pro a SUNS é l Sard, Furlan, Todesch, Albaneis, Franco-Provenzal, Franzeis, Ozitan, Sloven, Ladin, Catalan, Croat, Gric, Romani - per la Talia, rumanc per la Svizera, Romani, Croat, Sloven, Ungareis, Cech - Slovach per l'Austria, Ungareis, Romani, Talian,

Todesch - per la Slovenia y Ozitan, Franco-Provenzal, Catalan, Romani per la Franzia.

Termen: 1. de setember 2013

I grups de mujiga dles vals ladines y i ciantautours ladins vegn sen inviés a tó pert, con mané ite a l'organizacion anter l prum de setember 2013 na ciantia con test ladin tl format mp3 y d'auter material informatif sun la ciantia y i musizisc. Dut vegn mané a la miscion eletronic: sunscontest@gmail.com Persones de contat é anter l auter Leo Virgili (tel. 334 36 666 14) y Marilena Defrancesco (tel. 335 13 480 56).

I documenc per tó pert possa gni

desçiariés da internet, dal sit www.sunscontest.com

Selezion per la finala de SUNS con 6 - 8 finalisc

Anter dutes les cianties ruvedes ite gniral cernù da na Giuria da 6 a 8 finalisc, che gnirà inviés a porté dant si toch dal vif tl Teater Navatge a Moena (Fascia) l di 9 de november 2013. Ai doi davagnadours de SUNS 2013, premiés respetivamenter da na Giuria de cualité y dal Publich aldò dles modalitès fissedes da l'Organizacion, i spetaral n pest de 1.000,00 euro porom y l'amiscion eventuala a la fasa finala dl LIET INTERNATIONAL (www.liet.nl), l festival dla ciantia de mendranza plu important. (ir)